

Kaarata ya nabiili ya Pawulo yoomulebela Timoteyo

Madhu oovolowana

Murumiwi Pawulo alebile kaarata ela agali mukaambura ya oRoma muwari mwa yaaka ya 65 ofiyedha 68 Kirixtu agabaliwe. Amulebele Timoteyo asogolela-ga gerezha ya oEfeso.

Kaarata ela yalebeliwe wi emulibihe Timoteyo eeddege pama. Pawulo afuna wi muzombwe aaye ole oomukamihedha mabasa oolaleya alibihedhe dha osogoleli waaye, womwiirela Yesu Kirixtu onamoona, ahare mooromeleya dhosuuziha dha ebaribari wi onaahiye olaleya ni osuuziha vaari va dhoovoreya ni dhoorusa, akooddege dhosuuziha dhooratha, aharege mweeddelo wa Pawulo.

ARoma yoofuna ompa Pawulo mowaaguva, mowindo oliye ahifuna wi Timoteyo adhe yoonane.

Ogawanyeya wa kaarata

Madhu oolojela *1.1-2*.

Pawulo onomulibiha murima Timoteyo *1.3-18*.

Munyakoddo apama a Yesu Kirixtu *2.1-13*.

Mwiimeleli oorumeedheya ni Mulugu *2.14-26*.

Dhoothega dha malabo oomariha *3.1-9*.

Maleba Ootaleleya maatene bi madhu a Mulugu *3.10-17*.

Olaleye madhu a Nabwiya *4.1-8*.

Dhookokomezha dhoogomihedha *4.9-18*.

Malojelo oogomihedha *4.19-22*.

Madhu oolojela

1 ¹⁻² Wa we Timoteyo, mwaanaga oodhivela. Di miyo Pawulo, murumiwi a Yesu Kirixtu mwa ofuna wa Mulugu, osakuliwe wi alaleyele yoororomeliha ya egumi eli mwa Yesu Kirixtu.

Mulugu Babiihu ni Nabwiya Yesu Kirixtu yuweeddiwele thagaraga, yuuvaha mahala ni murendele mmurimani mwaawo.

Pawulo onomulibiha murima Timoteyo

³Ginomutthetheela Mulugu, oyene ginamulabiimi ni murima woweela wona mweerela makolo aaga, ginowuwuubuwelela weevo mmalobeloni mwaaga mutana ni mahiyu. ⁴Goobuwelelaga mitori dhaawo ginowuurabulela wuwoona wi gidhaaliwe ohagalala. ⁵Ginowuubuwelela nrromelo naawo na ebaribari, nili nrromelo nimohive vowambeela nanna amaayo mmeewa Loyidi ni amaayo Ewunisi. Gihikanna ebaribari wi we teto ohukanna. ⁶Mwaha wa ela, ginowuukokomeza wi otetedhele mvahi oli mwa we wuuvahile Mulugu vevale vooheliliimi madada. ⁷Vowi Muneba onivahile Mulugu kunadhiiha woova, mbwenye onavaha kopolo, odhivela ni owaraala.

⁸Mowindo kukalena manyazo omwiirela onamoona Nabwiya eehu, naari okalana manyazo wa miyo, munyakaambura aaye, moohiyaniha, we orabule vamohi ni miyo mwaha wa Muselu Wapama, nneere ovilela odheela owodha wa Mulugu. ⁹Oliye ohunivulumusa teto ohuniithanela mabasa oweela. Dhedhi keerilena mwaha wi hiyo nahiirana dhapama, eehi, mbwenye mwaha wa ofuna ni mahala aaye. Ohunivaha mahala ala vasasanyedheliiye onirumihedha Yesu Kirixtu elabo ehinapaddusiwe. ¹⁰Mahala aaye ala yooneyihiwe odheela wa okumelela wa Mvulumusi eehu Yesu Kirixtu. Oliye ohubwanyula owodha wa okwa vano teto odheela mwa Muselu Wapama ohooneyiha egumi yoohumala. ¹¹Ola bu Muselu Wapama othomeliwiimi wi gikale namalaleya, murumiwi ni namasuuziha. ¹²Mwaha woolaleya waaga ginoorabula mukaambura mu, mbwenye miyo kaginakanna manyazo, vovi gihimunona oyene ginamuroromeliimi vano ginororomela wi oliye onowaanda okameela yoologolela yaaga, ofiyedha nlabo nddo. ¹³Ohiiwa ni miyo madhu ookamihedha. Weeddege oharaga mutheenga ola mwa nrromelo ni odhivela mwa Yesu Kirixtu. ¹⁴Odheela owodha wa Muneba Woweela oli mwa hiyo, okameele yoologolela yapama eroromelihiwiwe.

¹⁵Weevo ohunona wi aKirixtu aatene a elabo ya oAziya yahigihya, mwa aliwa di Fizhelu ni Herimozhene. ¹⁶Yiireye wi Nabwiya eeddiwele thagaraga murala wa Onisiforo, mwaha wi oliye oogikamihesa, vano kaaalana manyazo odha ogoona, naari ngalive oofugeliwa. ¹⁷Moohiyaniha, oliye agafiyile oRoma, ahigisayela-sayela ofiyedha ogifwanya. ¹⁸Yiireye wi Nabwiya amweeddiwele thagaraga, ahimwiirele yamfwaneelele nlabo nddo!^a We Timoteyo, ohunona pamadhene wi Onisiforo ohugiimelela mwa mikalelo dhijinji oEfeso.

^a 1.18 *Nlabo nddo* nnaagiwana nlabo Mulugu nneeriyee anithonge, othongi woogomihedha. Moone AKorintu a Nabiili 5.9-10.

Munyakoddo apama a Yesu Kirixtu

2 ¹Mowindo we mwaanaga, okale oolibihiwa mwa mahala eli mwa Yesu Kirixtu. ²Dhiinova madhu yawiwilliwe wa miyo vameentoni va anamoono ajinji wawinke athu oororomeleya, ale teto enaanda waasuuziha amohi.

³Ovilelena orabula vamohi ni miyo wona munyakoddo apama a Yesu Kirixtu. ⁴Kalivo munyakoddo onavolowela dhego dheebeweene mwaha wi yoofuna yaaye fu omuhagalaliha mpogo aaye omucedhile. ⁵Muthu oothamaga vama pokani kanathambila ahaakwanihile moohariha malamulo a mapokaya. ⁶Namalima onahidda mabasa aaye moolibihedha dinafwanelela okala muraaji ohadda. ⁷Wuubuwelele pama dhedhi dhinowaaddeliimi, vowi Nabwiya onoodha oovahe wiwelelamo dhego dhaatedhene.

⁸Omuubuwele Yesu Kirixtu, ole avenyihiwe muukwani, namabaliwelamo a Davidi, ola bu Muselu Wapama ginalaleyiiimi. ⁹Ginowoona goyi mwaha wa mutheenga ola, gihimagiwa wona nambure, mbwenye madhu a Mulugu kimagiwe naari. ¹⁰Mowindo ginovilelana dhaatedhene dhedhi mwaha wa athu oosakuliwa ni Mulugu wi aliwa teto yaakele ovulumusiwa oli mwa Yesu Kirixtu wi teto yaakele nthithimiho noohumala. ¹¹Madhu ala boororomeleya:

“Nahaakwe vamohi ni oliye teto naakalege vamohi ni oliye.

¹² Navilelave teto nalamulege vamohi ni oliye.

Namukoodda, oliye teto onoodha anikoodde;

¹³ nakala oohuroromeleya, oliye onakalave oororomeleya, vowi kanaande wikoooda yeeka”.

Mwiimeleli oorumeedheya ni Mulugu

¹⁴Timoteyo, wawuubusedhege aKirixtu dhego dhaatedhene dhedhi, vano waawaraalihege mooliba vameentoni va Mulugu wi ehikanganege mwaha wa madhu. Okangana wowindo kunapuriha yego, mbwenye onaabwanyula ale eneewaya. ¹⁵Wiilibihedhege wi weepeleke vameentoni va Mulugu wona muthu waakwanihile weehiwa wona mwiimeleli ohiirilena yego yookaliha manyazo teto wona mwiimeleli oosuuziha mowaakwanela mutheenga wa ebaribari. ¹⁶Orabelege dhoothapanya dhinakoodda Muselu Wapama wa ebaribari teto orabelege dhoothapanya dhoo hukalana mpurelo. Vowi dhoothapanya ndo dhinowaathukulela athu othegagave. ¹⁷Dhoowoga dheewa dhinomwadheya wona namugovola. Athu abiili enawoga ndala di Heminewu ni Fileto. ¹⁸Ala ehilowala mu dila ya ebaribari, enawoga wi ovenyihiwa muukwani ohiireya. Ndala

enovunyangedha nrromelo na athu amohi. ¹⁹Mbwenye matibelelo ooliba a Mulugu ehikalawoove. Ehitopiwa ni madhu ala: “Nabwiya ohaanona athu eli aaye”. Teto vihikala madhu ala owi: “Aatene enarromela ndina na Nabwiya, erabelege dhoothege”.

²⁰Mu nyuba yuulubale kamunakala dhoobove dha oro ni dha parata baahi, munokala teto dha muthanko ni dha ologo. Dhimohi dhinakala dha mabasa oorihya, dhimohi dha mabasa oohiyana-hiyana. ²¹Mowinda muthu eyeeliha mwa dhoovirigana nda, oliye onakala wona yoobo ya mabasa orihya, onakala oweelihiwa, oofuneya wi amwiimelelege Nabwiya, onakala osasanyedhiwa wa mabasa maatene apama.

²²Othawege dhifunelo dhabure dha ezombwe, vano othamagelege wogoowa, nrromelo, odhivela ni murenddele, wiiregena nda vamohi ni ale enamwiithana Nabwiya ni murima woweela. ²³Orabelege dhoovaa-nyihana dha otaduwa dhihinna mabasa, ohunona wi dhinotatamula okangana. ²⁴Vano mwiimelele a Nabwiya ahikalelege okanganave ni akwaaye. Moohiyaniha, akalege oofwaasa ni aatene, owaanda osuuziha, akalege oovilela. ²⁵Aasuuzihege ni wiyeviha ale enamvaanya. Adha ayo Mulugu aavaha otthwaruwa onaamalele ni ononelamo wa ebaribari. ²⁶Vano athu ayo yeera yambeela wuubuwelela pama, eneere otapuliwa vamusapani wa Ddiyabo,^b musapa oyene waamagiliyena wi yiiregena dhoofuna dhaaye.

Dhoothege dha malabo oomariha

3 ¹Onone wi: Mwa malabo oomariha onofiya mudhidhi woorusa. ²Athu enoodha ekale a nrima, oodhiveliwa korowa, owiithukulela vajinji, oomunyemula Mulugu, oohawiiwelela ababiwa, oohutthetheela, oohumuriha Mulugu, ³oohukalana odhivela, oohulevelela, enoodha ekale anamaaba, oohihiiha, enoodha ekale anambure, amwiiddani a dhapama, ⁴agwalagwambi, owumma mirima, aliba wiihelamo, oodhiveliwa dhoohagalasa dha mwiilaboni omwihiya Mulugu, ⁵owiyooniha wi boomurromela Mulugu, ekooddaga owodha waaye. Athu owindo, waarabelege.

⁶Mwa alena bi alobwana ayene enavolowa mmanyubani yaanyengethaga ahiyana oolodhowa. Ahiyana ala ehidhaaleliwa dhoothege, enojeya mirima ni dhidhivi-dhivi dheewa dhoohiyana-hiyana. ⁷Aliwa enosuuzave, mbwenye kinaanda odidela ebaribari. ⁸Alobwana eneerana dhedhi eli wona Zhanesi ni Zhambere ayene wale yamwiinyuwele Mozezi,^c dhiinova teto anamasuuziha ooratha ala enowiinyuwela ebaribari. Mirima dheewa dhihipahuwa, vano yahixixa ohara nrromelo, mbwenye yahilepela.

^b 2.26 *Ddiyabo* thi ndina nimohi na Sathana. ^c 3.8 *Zhanesi ni Zhambere* yaali aliba masenga yahimwiinyuwela Mozezi vameentoni va Farawo. Moone Okuma 7.11-22.

⁹Aliwa kinaande waanyengetha athu ajinji vowi aatene eneere wawoona otaduwa weewa, wona teto dhampadduwele Zhanesi ni Zhambere.

Maleba Ootaleleya maatene bi madhu a Mulugu

¹⁰Mbwenye we Timoteyo, wahiharave masuuziho aaga, meeddelo aaga, yoopima yaaga, nrromelo, oleva waaga, odhivela waaga, ntidi naaga, ¹¹oharahariwa ni goyi gooniliimi, dhego dhagipadduwela oAntiyokiya, olkoniyo ni oLixtara. Dhooharahariwa dhijinji gihivilelana! Vano mwa dhaatedhene Nabwiya ohugivulumusa. ¹²Ebaribareene aatene alene enafuna okalana egumi yoomuriiha Mulugu mwa Yesu Kirixtu eneerege oharahariwa, ¹³mbwenye athu ooholowa ni ooratha enoowelega etthabwegeve, enyengethaga, aliwa teto enyengethiwaga.

¹⁴Mbwenye we okalegeve mwa nde dhisuuziliwe, dhiroromeliwe, omunonaga oyene wusuuzihile, ¹⁵vano ononege wi wambeela ezombwe yaawo wahinona teto Maleba Ootaleleya, ayene yaande wuukaliha oononelamo ovulumusiwa vooomuroromela Yesu Kirixtu. ¹⁶Maleba Ootaleleya maatene bi madhu a Mulugu enaavahiye anamaleba, enokamihedha osuuziha wi esumulule, ekooddihe, yawaaddelihe okala owogoowa, ¹⁷wi muthu a Mulugu akale owaanda ni owiisasanyedha wiirana meerelo maatene apama oohiyana-hiyana.

Olaleye madhu a Nabwiya

4 ¹Vameentoni va Mulugu ni va Yesu Kirixtu, oyene onaathonge agumi ni ookwa, teto mwaha wa owela waaye ni Omwene waaye, miyo ginowuwaraaliha mowuulibiha wi: ²Olaleyeye madhu a Mulugu. Okalege owiisasanyedheene wi olaleye mwa mudhidhi naari voohukala mudhidhi. Waasumululege, waahiihege, waalibihege ni ovilela waatewene, waasuuzihaga madhu a Mulugu. ³Vowi onoodha ofiye mudhidhi, vevo athu vihinaafunigiisu wiiwa dhoosuuziha dhookamihedha. Moohiyaniha, wi yihagalalihege weekiwa, aliwa eneere wiyapeleliha ni anamasuuziha enaawogege dhinaafunigiisu wiiwa baahi. ⁴Aliwa eneerege ovaanya ovuruwana ebaribari, yiipelekege muthalakoni dhooratha dha emakolo. ⁵Mbwenye we okale owiyiinanela mwa dhaatedhene, ovilelege mwa dhoovoreya, ohidde mabasa aawo oolaleya Muselu Wapama, wiirena omwiimeleli waawo mowaakwanela.

⁶Miyo gineere okuthuliwa wona yoovelela ya yong'wa. ^dMalabo aaga ehimala. ⁷Gihiwana koddoo yapama, gihimariha pama othamaga, gihiinanela nrromelo. ⁸Dhiinova gihilogoleleliwa kara ya nthithimiho mwaha wowogoowa. Nabwiya oli namathonga owogoowa onoodha agithikele

^d 4.6 Okuthuliwa wona yoovelela ya yong'wa. Pawulo awogaga dha opiwa waaye.

kara eyo Nlabo nddo, vano ahili miyeeneve baahi mbwenye teto aatene ayene enarabulela odha waaye.

Dhookokomezha dhoogomihedha

⁹Osayeleye odha mowaaguva ogumane ni miyo. ¹⁰Vowi Dema ohuginyanyala mwaha wa odhiveliwa dha elabo ela, odhowile oTsalonika. Keresenti odhowile oGalasiya, vano Titu odhowile oDalamasiya. ¹¹Luka yeeka dili ni miyo. Omusayeleye Maruku, mudhe wuno vamohi mwaha wi oliye doofuneya mmabasani mwaaga. ¹²Tikiku gimurumile oEfeso. ¹³Wadhaaga odhegena mukanjo waaga oyene gahiyiliimi ni Karipu oTorowaddi. Ogithukulelewo teto maniivuru aaga, tthabwa-tthabwa ale a makupa.^e

¹⁴Alixandere, meesili a dhoohana, ahigiirela dhabure vajinji. Nabwiya onoodha amulage mooligana ni dhedho dheeriliye. ¹⁵We teto wiyiinanele mwaha wi oliye oovaanyihana vajinji ni mutheenga weehu.

¹⁶Othongiwa waaga wowambeela kavaali muthu adhiile ogiirela onamoono, aatene yahiginyanyala. Gifunile wi Mulugu aalevelele. ¹⁷Mbwenye Nabwiya aali ni miyo, ahigivaha kopolo wi odheela wa miyo madhu maatene a Muselu Wapama ekale oolalelyeliwa, athu a malogo maatene yawiwe. Mowindala gahivulumuwa muwano mwa poddogoma. ¹⁸Nabwiya onoodha agivulumuse mwa dhabure dhaatedhene onoodha agithukulele pamadhene mu Omweneni waaye wa odhulu. Oliye akale oothithimihiwa okala ni okala. Ameni!^f

Malojelo oogomihedha

¹⁹Ovelelewo malojelo wa Pirisila ni Akwila vano teto a murala wa Onisiforo. ²⁰Eraaxtu ahihala oKorintu, vano Torofimu gamwihiyile abulelaga oMileto. ²¹Waaguve odha ohunafiye mudhidhi wooddiddila. Akwiihu Yuubulu, Pudenti, Lino, Kalawudiya ni aKirixtu aatene yiire malojelo. ²²Nabwiya akale ni muneba waawo. Mulugu oowomeleni muri-ma wa nyo.

^e 4.13 Mudhidhi wa Pawulo athu yaaleba makaarata eewa oofuneyesesa mmakupani. Makupa ayo yasasanyedhiwa olebiwa. ^f 4.18 Ameni enatapulela *Dhikale ndo*, naari wi *Siibaribareene*.